

ster desideratus *Georg. Crausserus in scintill. Tullian. p. 156.*

Nobis verò hoc loco non est res cum quovis corporis integri tumore vel habitu exsuperante, cujusmodi species varia varias causas agnoscentes in pathologia occurrunt, & sua peculiariora nomina sortiuntur, nec non curationes distinctas requirunt. Ideoque καχεξία seu malus corporis habitus tumens, hydrops, & à veneno aliisque causis oriundus universi corporis tumor non ad obesitatem pertinet. Sic in Hypochondriaco affectu adesse obesitatem nonnunquam veram, non nunquam apparentem, ob serositatem & flatuum, quibus corpus turgescit, copiam, indicat magnus noster inter vivos olim, nec jam infirmus inter beatos *Guern. Rolsincius in Epitom. method. Cognosc. & cur. part: affect. l. 3. c. 11. p. 247.*

Deinde distinguunt & separant quidam obesitatem à corpulentia, quod hæc carnosum, illa verò pingvem corporis habitum denotet; alii tamen non semper adeò accurate hanc differentiam attendunt, aut rarò à se invicem statum hunc separatum ducunt atque dicunt, de quo plura in sequentibus trademus, & si placet videri potest *Sennertus prax. Med. l. 5. part. 1. c. 4. p. 22.* A nobis autem hoc loco obesitas accipitur uti communiter ea in scholis Medicorum accipi solet, & denotat pingvem & bonum corporis habitum, ευσαρκεον à quibusdam dictum, qui etiam ab Hippocrate ευσξία dicitur; sed insimul habitus iste συμμετρία corporis, vel reliquarum partium ordinariam superat, atque sic actu, vel potentia facile lædit corporis actiones, aut majora mala minatur, de quibus subsequenti plura detegent.

Sunt equidem nonnulli, qui strictiùs obesitatem pro summo pinguedinis statu, adeoque morbofo reputant, & bonum habitum vel habitudinem pro sano & integro statu, utpote qui medium teneat inter gracilem & obesum, veluti ex mente *Galenì* se loqui dicit *Paul. Zachias in question. Med. legal. tom. 1. l. 5. tit. 2. quest. 12 p. 399.* Verùm communi valore denotat obesitas pingvem corporis habitum, quò gradu tandem requiescat eadem; quamvis interdum illi addatur epitheton nimii vel exsuperantis, veluti nobis etiam placuit exprimere affectum, quem nostræ jam considerationis esse volumus. Non